

ozi a di 28, fin questo zorno il corier non è partito. È zonto letere di Franza, da la corte, di 14, al suo orator: par il Re, per questo anno non vegnerà in Italia, et aspeta la Raina qual vien d'Ingaltera a la qual se li prepara gran feste in Franza. *Item*, come era stà retenuto lì a Roma in Castello uno capellan fo dil cardinal d'Ingaltera che morì, si dize ha tosicato ditto cardinal; el qual capelan si ha morto lui medemo, e il Papa l'ha fato apicar *publice* cussi morto e poi fato squartar. *Etiam* ha fato retenir alcuni altri. Par el dito capelan confessasse che uno dil paese d'Ingaltera ge l'havea fato far; *tamen* per li altri retenuti si saperà la verità.

La Lanterna di Zenoa, a di 26 si dovea render a' zenoesi, perchè cussi era il termine; si dize zenoesi la ruinerano. Si dize che il re d'Ingaltera domanda a l'Imperador un milion di ducati per esser stà causa di averli fati spender l'anno passato in la guerra l'ha fato con Franza; et vol desfar le noze, e dal Papa otegnirà quello che 'l vuol, come fè *etiam* Franza col papa Julio. *Item*, a di 27, ha ricevuto letere di qui, di 23. L'orator stà mejo, si leverà suso, *tamen* ancora non si pol ajutar, non ha mal, ma è debile. Maximian, a di 15, dovea esser a Inspurch, ma ha auto mal grande, sichè non sarà se non a di 23, etc.

2 *Di campo da Bruzegana, dil capitano zeneral, di eri sera.* Come ha aviso i nimici certissimo è per levarsi fin do zorni. *Item*, a Verona si fortificha la terra di mantelleti e scale.

Di sier Domenego Contarini. In conformità queste nove: i nimici *ut supra*, E dil receiver di ducati 3000, ma sono pochi; fanti in campo partiti gran numero per non aver danari.

Da poi disnar fo Pregadi. E fo leto le infrascripte letere:

Di campo, di Crema, di sier Bortolamio Contarini capitano e provedador, di 26, con l' aviso di la vittoria.

Di Corphù, dil baylo e dil provedador di l' armada. Zercha biscoti per le galie è li, di Napoli di Romania.

Di Candia, di sier Bernardo Barbarigo capitano e vice duca. Le galie ha spazato, numero.... E nota: la galia armata per il duca di Nischia, scrive el provedador, è bon darli licentia per esser armata a so' spexe et è mal farli patir danno.

Di sier Zuan Nadal Salamon e sier Marco Antonio Calbo sindici in Levante, date in Cipro, a di Come si scusano zercha quello li è stà imposto, perchè hanno eseguita la sua commis-

sione, e zerchato scuoder più che i hanno potuto e far li debitori pagino, etc.

Di Hongaria, di sier Antonio Surian doctor, orator nostro, di 10. Zercha la cruciata. Il cardinal Istrigoniense li ha parlato dolendosi di la Signoria non vol pagar quello dia aver il Re. Et zercha far vengi carne in questa terra, ha scritto il Re una letera al conte Bernardin Frangipani, lasserà venir. *Item*, si aspetava do oratori di l' Imperador.

Fu posto, per li consieri, un salvoconduto in la 2 persona *tantum* per uno anno a sier Simon Valier, qu. sier Piero. E fu preso, 30 di no, 104 de si.

Fu posto per li savii ai ordeni di confinar sier Hironimo Zorzi capitano di le galie di Baruto per tuto luni a di 4 in galia. E fu presa; qual debi partir zorni da poi, e poi do zorni la vecchia galia.

Fu posto, per li savii, elezer *de presenti*, uno orator in Ingaltera, qual vadi insieme con sier Alvis Mozenigo el cavalier in Franza a alegrarsi da quella Majestà, poi vadi in Ingaltera da quel Serenissimo Re a far simel officio, et star de li per orator nostro, con ducati 120 al mese, meni con si cavali 11 computà il secretario et do stafieri, possino esser electi *etiam* di quelli fusse rimasti in rezimento, et rimanendo et acetando sia electo in suo locho in qual rezimento fusse rimasto, possi esser tolti di ogni luogo et officio, *ut in parte*. E fu presa, et fo tolto il scurtinio, tolti numero, ma non fo ballotati. Erano nominati sier Polo Capello el cavalier e sier Marin Zorzi el doctor, tutti do rimasti dil Consejo di X ordinarii. Si voleano excusar, ma visto le leze, fo terminà per la Signoria fosseno ballotati.

Fo prima Consejo di X, con la zonta, e leto letere di Roma e di Franza.

Et sier Hironimo da cha da Pesaro el consier, venuto provedador zeneral di Treviso, andò in rennga, e fe' la sua relatione, havia li un modello di la città di Treviso.

Di campo, fo letere, Come erano zonti li 16 milia ducati, et spagnoli devano danari a le so zente, e fevano mostre; le qual zente si dovevano perchè li avanzava 4 page.

Etiam vene letere dil capitano zeneral con una letera auta di Roma di uno suo li scrive zercha le cosse dil Papa, intervenendo questo acordo di Franza et Ingaltera, et quale è la volontà dil Papa, zercha la venuta di francesi, etc. Leta con i Cai di X.

Et Pregadi stete suso fino hore 24; ma prima fono lecte do opinion di savii zercha scuoder i debi-